

Առարկություններ և բացատրություններ

1. ՀՀ կառավարության 2002 թվականի հունիսի 29-ի N 867 որոշման հավելված N 5-ի 14-րդ և 17-րդ կետերով սահմանված պահանջների իրականացման համար, Առողջապահության նախարարության կողմից ներկայումս մշակման փուլում է գտնվում բժշկական հիմնական սարքավորումների շահագործման թույլատրելի ժամկետների վերաբերյալ հրամանի նախագիծ, որով նախատեսվում է իրավական կարգավորում տալ այդ գործառույթների իրականացմանը:

2. «Լիցենզավորման մասին» ՀՀ օրենքի 14-րդ հոդվածի 1-ին մասը սահմանում է, որ ֆիզիկական անձանց որակավորման ստուգում են համապատասխան լիցենզավորող մարմնի կողմից ստեղծված որակավորման հանձնաժողովները, եթե օրենքով կամ լիցենզավորման կարգերով այլ բան նախատեսված չէ: Որակավորման հանձնաժողովների կազմավորման կարգերը և կանոնադրությունները հաստատում են լիցենզավորող մարմինները, եթե օրենքով այլ բան նախատեսված չէ:

Հաշվի առնելով, որ որակավորման հանձնաժողով չի ստեղծվել և չեն հաստատվել կազմավորման կարգեր՝ ֆիզիկական անձանց մասնագիտական որակավորման պահանջների համապատասխանությունը ՀՀ օրենսդրությամբ սահմանված դրույթներին իրականացվել և իրականացվում է լիցենզավորման գործակալության աշխատակիցների կողմից:

Միաժամանակ տեղեկացնում են, որ «Լիցենզավորման մասին» ՀՀ օրենքի 13-րդ հոդվածի 6-րդ մասը սահմանում է, որ սույն օրենքի 43-րդ հոդվածի 2-րդ մասի աղյուսակով ֆիզիկական անձանց մասնագիտական որակավորման պահանջի դեպքում անձի մասնագիտական որակավորումը հաստատող փաստաթղթերի պատճենները լիցենզավորող մարմին պետք է ներկայացվեն մինչև լիցենզավորված գործունեության իրականացումն սկսելուց հինգ աշխատանքային օր առաջ, իսկ դրանց փոփոխությունները՝ դրանք կատարվելուց հետո՝ 3 աշխատանքային օրվա ընթացքում, բացառությամբ օրենքով որակավորված անձանց նկատմամբ սահմանված այլ պահանջներ լինելու դեպքի, երբ սահմանված է, որ որակավորված անձը պետք է ապահովի նաև այլ նախապայմաններ, որոնք անհրաժեշտ են լիցենզիա ստանալու համար: Հետևաբար, ՀՀ կառավարության 2002 թվականի հունիսի 29-ի N 867 որոշման հավելված 5-ի 18-րդ կետը բխում է վերոնշյալ օրենքից:

3. Հայտնում են, որ Առողջապահության նախարարությունը պետական եկամուտների կոմիտեի համապատասխան տեղեկատվական համակարգ մուտք գործելու հնարավորություն չունի, հետևաբար, չի կարող տեղեկացված լինել լիցենզավորված կազմակերպությունների կողմից լիցենզավորման ենթակա գործունեությունը սկսելու վերաբերյալ: Նման տեղեկատվություն Առողջապահության նախարարությունը կարող է ստանալ կամ պետական եկամուտների կոմիտեի, կամ Առողջապահական և աշխատանքի տեսչական մարմնի, կամ լիցենզավորված անձանց կողմից, մինչդեռ նման տեղեկատվություն վերջիններիս կողմից լիազոր մարմին չեն ներկայացվել:

Ձեր կողմից ներկայացված 268 կազմակերպությունների վերաբերյալ տեղեկատվությունը համապատասխան գրությամբ կներկայացվի Առողջապահական և աշխատանքի տեսչական մարմին հետագա գործընթացն ապահովելու նպատակով:

Միաժամանակ տեղեկացնում են, որ ներկայումս քննարկումների փուլում է գտնվում պետական եկամուտների կոմիտեի տեղեկատվական բազային միանալու հնարավորության հարցը՝ վերջիններիս բազայից տեղեկատվություն ստանալու և վերլուծություն իրականացնելու նպատակով:

4. Պետության կողմից երաշխավորված անվճար և արտոնյալ պայմաններով բժշկական օգնության և սպասարկման ծառայություններ իրականացնելու հայտերը ուսումնասիրվում է նաև լիցենզավորման գործակալության կողմից և լիցենզավորված տեսակների առկայության կամ բացակայության վերաբերյալ ելքագրվում են պատասխան գրություններ, որտեղ կատարվում են հատուկ նշումներ՝ կադրային փաստաթղթերի վերաբերյալ:

Միաժամանակ տեղեկացնում են, որ համաձայն ՀՀ առողջապահության նախարարի 2015 թվականի սեպտեմբերի 17-ի N 49-Ն հրամանով հաստատված բժշկական օգնության և սպասարկման պետական պատվերի տեղադրման կարգի, պետության կողմից երաշխավորված անվճար և արտոնյալ պայմաններով բժշկական օգնության և սպասարկման ծառայություններ իրականացնելու հայտերին կից ներկայացվում է գործարար ծրագիր, որի մարդկային ռեսուրս էջը (HR)

ներառում է տեղեկատվություն՝ աշխատողների թվաքանակի, միջին ամսական աշխատավարձի ցուցանիշների և կադրային հագեցվածության մասին:

5. Համաձայն ՀՀ կառավարության 2002 թվականի հունիսի 29-ի N 867 որոշման հավելված N 5-ի 18-րդ կետի՝ լիցենզավորված անձը լիցենզավորված գործունեությունն սկսելուց առնվազն հինգ աշխատանքային օր առաջ լիազոր մարմին է ներկայացնում համապատասխան որակավորված անձի մասին տեղեկատվություն, իսկ մինչ այդ կազմակերպության գործունեության մասին տեղեկատվություն չի գրանցվում:

Միաժամանակ տեղեկացնում են, որ որևէ իրավական ակտով նախատեսված չէ, որ լիցենզավորված կազմակերպությունների կողմից կադրերի վերաբերյալ տեղեկատվություն չներկայացնելը, պարտադրում է լիազոր մարմնին, առողջապահական և աշխատանքի տեսչական մարմին ներկայացնել տեղեկատվություն:

6. «Լիցենզավորման մասին» ՀՀ օրենքի 9-րդ հոդվածի համաձայն լիցենզավորող մարմինն իր որոշումներն ընդունում է համապատասխան հանձնաժողովի եզրակացության հիման վրա: Նույն օրենքի 40-րդ հոդվածը սահմանում է, որ հանձնաժողովները հարցերը քննարկում են իրենց նիստերում:

Հանձնաժողովների նիստերն իրավազոր են, եթե դրանց մասնակցում են հանձնաժողովի անդամների կեսից ավելին: Հանձնաժողովների որոշումներն ընդունվում են նիստին մասնակցող անդամների ձայների պարզ մեծամասնությամբ՝ փակ գաղտնի քվեարկությամբ:

Ձեր կողմից մատնանշված լիցենզավորված անձանց փաստաթղթային և տեղում ուսումնասիրությունների արդյունքում լիցենզավորման գործակալությունը տվել է բացասական եզրակացություն, սակայն հանձնաժողովի փակ գաղտնի քվեարկության արդյունքում տրվել է դրական եզրակացություն, ինչը ոչ միայն արգելված չէ վերոնշյալ օրենքով և լիցենզավորման ոլորտը կանոնակարգող այլ իրավական ակտերով, այլ նաև համապատասխանում է լիցենզավորման հանձնաժողովի լիազորությունները սահմանող նորմերի դրույթներին:

7. Առողջապահության նախարարի 2014 թվականի սեպտեմբերի 3-ի թիվ 58-Ն հրամանով նախատեսվել է ընտրանքային ուսումնասիրությունն իրականացնել համակարգչային պատահական ընտրության միջոցով, և 20%-80% հարաբերակցությունը ի սկզբանե սահմանված է եղել այդ ծրագրով:

Միաժամանակ տեղեկացնում են, որ ներկայումս մշակման փուլում է գտնվում հրամանի նախագիծ, որով նախատեսվում է իրավական կարգավորում տալ ընտրանքային ուսումնասիրության տոկոսային հարաբերակցությունը: